

# Tuanku Canselor meriahkan majlis berbuka puasa bersama warga UMP



Kebawah Duli Yang Teramat Mulia Tengku Mahkota Pahang, Tengku Abdullah Al-Hajj ibni Sultan Haji Ahmad Shah Al-Musta'in Billah yang merupakan Canselor Universiti Malaysia Pahang (UMP) berkenan berangkat memeriahkan Majlis Berbuka Puasa bersama lebih 1,000 warga UMP yang berlangsung di Masjid UMP Gambang pada 10 Julai 2014 yang lalu.

Majlis turut dihadiri, Menteri Besar Pahang, YAB Dato' Seri Diraja Haji Adnan Haji Yaakob, Timbalan Yang di-Pertua Majlis Ugama Islam dan Adat Resam Melayu Pahang Orang Kaya Indera Pahlawan, Dato' Sri Wan Haji Abdul Wahid Haji Wan Hassan.

Dalam majlis ini, Tengku Mahkota Pahang, Tengku Abdullah turut berkenan menyampaikan sumbangan zakat kepada seramai 100 pelajar UMP yang terdiri daripada anak yatim dan golongan yang memerlukan.

Naib Canselor UMP, Profesor Dato' Dr. Daing Nasir Ibrahim berkata, sumbangan yang diterima ini adalah daripada pihak Majlis Ugama Islam dan Adat Resam Melayu Pahang (MUIP) untuk diagihkan kepada pelajar yang layak bagi menampung perbelanjaan mereka di universiti ini.

"Bantuan zakat itu bukan sahaja meringankan beban

untuk membeli keperluan menyambut Ramadan malah dapat membantu mereka meneruskan pengajian, dan sumbangan itu juga merupakan motivasi kepada pelajar miskin untuk berjaya dengan cemerlang dalam pengajian masing-masing.

"Bagi meringankan bebanan pelajar, pihak UMP juga turut menganjurkan program Ihya' Ramadan di dalam kampus. Ini termasuklah aktiviti rawang di mana juadah berbuka disediakan secara bergotong-royong oleh staf dari pelbagai pusat tanggungjawab mengikut giliran hari mulai 1 Ramadan hingga 26 Ramadan nanti," katanya.

Tambah beliau, dengan kos keseluruhan sebanyak RM 78,000 bagi 26 hari tersebut iaitu RM 3,000 setiap hari, juadah tersebut dapat disajikan untuk jamaan *ifthar jama'ie* bagi staf dan mahasiswa di UMP Kampus Gambang dan UMP Pekan.

Menurut Dato' Dr. Daing, keseluruhan perbelanjaan tersebut dibiayai oleh Tabung Aktiviti Ramadan UMP hasil sumbangan tunai warga universiti ini serta tajaan jamaan *ifthar jama'ie* oleh para dermawan.

Selain itu juga, program Ihya' Ramadan di UMP turut diisi dengan ibadah solat terawih berjemaah, tazkirah Zuhur, tadarus al-Quran dan seminar khas sempena sambutan Nuzul

Quran.

Ujar beliau, dengan infrastruktur dan kemudahan yang telah menjalani proses naik taraf di Masjid UMP Kampus Gambang dan UMP Pekan, maka aktiviti-aktiviti tersebut dapat dilaksanakan dengan penuh kelesaan oleh warga universiti ini.

Agenda pengisian Ramadan ini membuktikan komitmen tinggi warga universiti ini, sama ada staf mahu pun mahasiswa terhadap aktiviti-aktiviti bercorak amal dan kesukarelawan. Malahan, komitmen ini tidak hanya terserlah sepanjang bulan Ramadan, tetapi turut berkesinambungan pada bulan-bulan yang lain.

Pelbagai inisiatif libat sama (*engagement*) universiti-komuniti dimanfaatkan UMP agar kewujudannya dirasai dan kepakaran yang dimilikinya turut boleh dikongsi dengan masyarakat akar umbi.

Selain komitmen berterusan terhadap projek khidmat komuniti di tanah air, kini skop agenda kesukarelawan warga kerja, mahasiswa dan alumni UMP telah turut meliputi komuniti serantau dan antarabangsa.

Antaranya termasuklah membantu saudara seagama di negara Kemboja dengan Misi "We Serve, We Care" sejak Ogos 2013 yang menasarkankan 13 projek

pembangunan infrastruktur dan modal insan untuk warga Madrasah al-Nikmah al-Islamiyyah di Kampung Bait An Long di Wilayah Kompong Cham, Kemboja.

Begitu juga Misi "Titik Sentuhan" di Indonesia sejak tahun lalu yang memberi tumpuan kepada pembangunan sosio-ekonomi dan literasi ilmu terhadap masyarakat di Dusun Ngepring yang terletak di pedalaman Daerah Istimewa Yogyakarta.

Hadir sama dalam majlis Ahli Dewan Undangan Negeri (ADUN) Panching, YB Dato' Mohd Zaili Besar, Ahli Dewan Undangan Negeri (ADUN) Lepar, YB Dato' Sohaimi Jusoh, Ahli Dewan Undangan Negeri (ADUN) Pulau Manis, Khairuddin Mahmud, Pengerusi Lembaga Pengarah UMP, Dato' Mohd Hilmey Mohd Taib dan ahli-ahli Lembaga Pengarah UMP.

Turut hadir Timbalan Naib Canselor (Akademik & Antarabangsa), Profesor Dato' Dr. Mortaza Mohamed, Timbalan Naib Canselor (Penyelidikan & Inovasi), Profesor Dr. Mashitah Mohd. Yusoff, Timbalan Naib Canselor (Hal Ehwal Pelajar & Alumni), Profesor Dato' Dr. Yuserrie Zainuddin dan Pengarah Pusat Islam dan Pembangunan Insan (PIMPIN), Dr. Mahyuddin Ismail.